

Rufo Wever, un di e compositor nan den Concierto Weveriana

ORANJESTAD - Rufo Inocencio Wever a nace dia 8 di December 1917 na Wilhelminastraat 33, Oranjestad, Aruba, primogenito di e matrimonio di Leonila Maria Annette Lampe y Civilis Marcial Wever. Civilis tabatin un mente tecnico y e tabata gusta musica y tabata toca clarinet y cuarta. Net prome cu Rufo a cumpli 6 aña,

Rufo a haya un simfonia di boca regalo y den un par di dia el a sorprende su famia cu un pisa cu tabata na moda. Rufo su tata a keda masha impresionado y entusiasmo y mesora el a cumpra un piano y a contrata un maestra di musica di Corsou, Shon Shishi Rodriguez Timmer, pa duna Rufo les di piano y siñ'e e principionan di musica en general. Cu 12 aña ya e por a toca piano na un manera admirabel. El a siña su mes toca saxofon, guitarra, cuarta, clarinet, acordeon y diferente instrumento ritmico y via correspondencia el a sigui les di musica na un instituto di New York.

Tempo cu Rufo tabatin 15 aña el a lanta e orkesta Melody Band hunto cu diferente amigo. Despues Padu Lampe tambe a integra den e grupo aki. Na 1935 Rufo a haya e oportunidad pa toca cu e famoso compositor y

cantante Argentino Carlos Gardel cu a bishita Aruba e aña ey. Inspira pa e evento aki Rufo a lanta su grupo di tango Los Trovadores Tropicales.

Aña 1935 tin un nificacion musical historico: Rufo a compone su prome wals, titulo Arubanita. Despues a sigui un 450 composicion mas, tanto wals, como tumba, bolero, samba, mambo, porro, merengue, danza, mazurka, polka y calypso. Mas of menos 150 pisa ta composicion completo pa piano of orkesta y mas o menos 300 ta composicion y areglo pa cah'i orgel. Na edad di 21 aña Rufo a cuminsa traha cah'i orgel. El a haci esaki 33 aña y pa algun composicion pa cah'i orgel e tabata uza e nomber artistico A. N. Tillo. Rufo tabata areglista tambe. E accidente na 1941 cu a pone cu Rufo a

perde un brasa no a strob'e di sigui dedica su mes na su pasion di compon'e y toca piano. Otro composicion popular di Rufo ta: Encantadora, Annette, Aruba, Antillenhuis, Aruba Tiera Bonita, Mambo di Aruba, Mi Aruba Stima. Tambe Rufo a compone hunto cu otro compositor.

Agun di e piesanan aki ta Aruba Dushi Tera (cu Padu Lampe) Chanita (cu Padu Lampe y cu letra di Hubert Booi), Carnaval (cu Padu Lampe).

Na aña 1975 a condecora Rufo como Ridder in de Orde van Oranje Nassau. Dia 30 di december 1977 Aruba a perde inesperadamente un di su musiconan di mas grandi.

Dia 15 di april den Concierto Weveriana nos musiconan lo presenta un seleccion excepcional di Rufo su composicionnan. □



Maria Wever, compositor desconoci

ORANJESTAD - Maria Eusebia Wever, na bida cariñosamente yama Shon la, of la, a nace na Aruba riba dialuna 5 di maart 1923. Su tata tabata Civilis Marcial Wever y su mama Leonila Maria Annette Lampe. Su dos rumannan mayo

tabata Rufo Inocencio y Libia Martina. Despues a nace Maria su ruman homber mas chikito cu tabata yama Lucio Rafael.

Den su hubentud Maria tabata un persona hopi social y deportivo. E tabata hunga basketball y korfbal. Tambe e tabata core hopi riba rolschaats y e tabata gusta baila charleston. Como adulto hoben el a forma parti di Rode Kruis Aruba durante e periodo di segundo guerra mundial.

Despues cu Maria a caba su ULO, el a sigui percura pa su desaroyo intelectual.

Na grandi e tabata hopi aña un fiel bishitante di nos Biblioteca Nacional. Ora menos bo por a spera, e por a cuminsa combersa riba su temanan favorito cu tabata: astronomia, mitologia Griego y civilisacion antiguo.

Desde 17 di november 1943 te 15 di juni 1948 Maria tabata casa cu Edgardo Diaz. Di e

matrimonio aki a nace su dos yiunan, Glenda Maureen (1945) y Herbert Ivan (1947).

Durante un periodo cortico cu el a biba na Corsou Maria a siña e pasatempo di coleccionamento di stampia cerca Agustin Diaz, tata di su casa. Ta resulta cu spaarmento di stampia ta un metodo excelente pa desaroya un persona su conocimiento general. P'esey Maria e regala Ivan Daniel Diaz, su unico nieto, tur su stampianan, 17 album en total, pa stimula su desaroyo. Otro hobby di Maria tabata pinta, saca potret y musica.

Cu pasenshi y dedicacion Maria a yuda skirbi e ultimo composicionnan musical di su ruman Rufo Wever, kende den e ultimo etapa di su bida a haya problema cu su bista.

Rond di nacemento di su



nieto na 1980 Maria mes a haya un inspiracion pa compone.

Na total Maria a compone 17 pisa. Mayoria di nan ta wals, pero tambe el a compone cuater cancion, un cancion di cuna cu ritmo di wals titula Luna y Sol y un sambacalypso. Maria Eusebia Wever a fayece na edad di 69 aña, den marduga di diadomingo dia 11 di october 1992.

Den Concierto Weveriana di 15 di april publico por cera conoci cu diferente composicion interesante di Maria Wever. □